

Naalackersuisut matumuuna Inatsisartut suleriaasianni § 33 naapertorlugu aalajangiiffigisassatut siunnersuut uunga saqqummiuppaat:

Kalaallit Nunaata MARPOL-imut isumaqatigiisummi Ilanngussaq VI-mut atatillugu nunap immikkoortuatut tunuarsimaarfigineqarneranik Namminersorlutik Oqartussat atorunnaarsitsinissaat pillugu Inatsisartut aalajangiiffigisassaattut siunnersuut.
(Nunalerinermut, Imminut Pilersornermut, Nukissiutinut Avatangiisinullu Naalackersuisoq)

Tunngavilersuut

Umiarsuarnit silaannarmik mingutsitsineq avatangiisinut peqqissutsimullu ajoqutaasarpog. Tamanna tunngavigalugu FN-imi Imarsiornermut Suliniaqatigiiffiup 2008-mi MARPOL-imut isumaqatigiisummi Ilanngussaq VI, silaannarmik mingutsitsinermit tunngasoq akuersissutigaa. Isumaqatigiisummi aalajangersakkanut tapiliussa, umiarsuit mingutsitsinerinut tunngasoq taanna ilaatigut umiarsuarmit ikummarsaammik aniatitsinermit killiliivoq.

Kalaallit Nunaata MARPOL-imut Ilanngussaq VI-mut ilaalenera, umiarsuarmit ikummarsaatinik akuutissanillu avatangiisinut ajoqutaasunik allanik aniatitsinermit killiliinissamut iluaqutaassaaq. Ikummarsaammik silaannarmut aniatitsinerit peqqissutsimut, aammalu ilaatigut uummatikkut ajornartorsiuteqalernermit puat ajoquserneqarnerinik kinguneqarsinnaapput. Taamatuttaaq sialuup seernarsineranik, aammalu ilaatigut naasunut aalisakkanullu ajoqutaasumik avatangiisit seernarnerulernerinik kinguneqarsinnaavoq.

MARPOL-imut isumaqatigiisummi umiarsuit nalinginnaasumik ingerlatsinerini ajutoornerinilu mingutsitsinermit pinaveersartitsinissaq annikillisaanissarlu siunertarineqarpoq. Isumaqatigiisut ilanngussani assigiinngitsuni arfinilinni iluarsisutininik imaqarpoq. Taamaallaat MARPOL-imut isumaqatigiisummit Ilanngussaq I aamma II pinngitsooratik malinneqartussaapput, kiisalu nunat ataasiakkaat ilanngussat sinnerinik malinnissanerlutik namminneerlutik aalajangersinnaallugu. Kalaallit Nunaat maannamut Ilanngussaq IV-mi, umiarsuarmit imermut errortuutikumut tunngasumi aamma ilanngussaq VI-mi, silaannarmik mingutsitsisarnermut tunngasumi tunuarsimaarfigineqarpoq.

Maannarpiq nunarsuarmit umiarsuit niuffagiutit 95%-iisa MARPOL-imut isumaqatigiisummit Ilanngussaq VI malinnipput. Taamaattumik nunarsuarmit nunani tamalaani umiarsuit silaannarmik mingutsitsinerannik killilersuinissamut aalajangersakkanut tapersersuineq annertuvoq.

Ilanngussaq VI umiarsuit ikummatissaanni ikummarsaatit annertussusissaannut killiliussanik imaqarpoq. Tamanna ilaatigut HFO-mik atuinissamut periarfissanik killiliisuuvoq. Kisiannili Ilanngussaq VI-mi putsup gassianik saliissummik atuisoqartillugu HFO-mik atuisinnaaneq periarfissinneqarpoq. Aaqqiissutissap taassuma HFO-mik atuisarnermut assartuussisarnermullu (tankiniitillugit) inerteqquteqalernissap, 2029-mi atuutilersussatut naatsorsuutigineqartup atuutilernissaata tungaanut atorneqarsinnaanissaa naatsorsuutigineqarpoq. Taakku saniatigut Ilanngussaq VI umiarsuarmit silaannarmik mingutsitsisarneq pillugu maleruagassanik arlalinnik allanik imaqarpoq.

Kalaallit Nunaata MARPOL-imut isumaqatigiisummi Ilanngussaq VI-mut ilanngunnissaa ajornanningsuaraasussaavoq. Tamatumunnga kalaallit umiarsuaasa angisuut Ilanngussaq VI-mi

piumasaqaatinik malinnereernerat peqqutaavoq, taakku nunat tamalaat imartaanni piumasaqaateqarfiusuni angalasareeramik.

Pisortanut aningaasatigut allaffissornikkullu kingunerisinnaasai

MARPOL-imut isumaqatigiisummi Ilanngussaq VI-p atuutsinneqalernissaa akileraarutitigut akitsuutitigullu annertuunik kinguneqarnissaa naatsorsuutigineqanngilaq. Tamatumunnga inuussutissarsiortut isumaqatigiisummi silaannarmik mingutsitsinermik annikillititsinissaq pillugu piumasaqaatinik annertuumik malinnereernerat peqqutaavoq. Tassalu Ilanngussaq VI-p kingunerik akileraarutitigut akitsuutitigullu malunniutereersimassasut ilimantarpoq.

Isumaqatigiisummi piumasaqaatit naammassisinnaaniarlugit nalunaarusiornissaq pisariaqartinneqarpoq. Tamatumunnga atatillugu allaffissornermut aningaasartuutissat killeqartut Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfimmut maanna aningaasaqarnermut sinaakkusiussaasut iluanni akilerneqarnissaat naatsorsuutigineqarpoq.

Inuussutissarsiutinik ingerlatalinnut namminersortunut aningaasatigut allaffissornikkullu kingunerisinnaasai

Ilanngussaq VI atuutsinneqassappat atuutsinneqassanngikkaluarpalluunniit inuussutissarsiortunut kingunerisassat arlallit pinngitsoorneqarsinnaassanngitsut ilimantarpoq. Kalaallit umiarsuaat, nunani tamalaani angalasartut Ilanngussaq VI-mi piumasaqaatinik annertuumik malinnereerput, nunat tamalaat imartaanni angalasartuugamik. Umiarsuit taakku Ilanngussaq VI-p atuutsinneqalernerani nutaanik aningaasartuuteqartinneqarnissaat naatsorsuutigineqanngilaq. Royal Arctic Line-mit ilisimatitsissutigineqarpoq, umiarsuit Danmarkip aamma Kalaallit Nunaata akornanni angalasartut scrubberanlæg-inik, silaannarmik mingutsitsinermik annikillitsinissamik qulakkeerissutaasuni atuisuusut. Taamaalilluni umiarsuit taakku Ilanngussaq VI-mi piumasaqaatinik malinnereerput. Taamaakkaluartoq Ilanngussaq VI-p Kalaallit Nunaannut atuutsinneqalernerani, umiarsuit imaannarmi nunanilu allani angalariaatsitik peqqutigalugit sulii Ilanngussaq VI-mik malinnilersimannngitsut, ilanngussaq VI-mi piumasaqaatinik malinnilernissaminnut atatillugu nutaanik aningaasartuuteqarnissaat naatsorsuutigineqarpoq.

Innuttaasunut aningaasatigut allaffissornikkullu kingunerisinnaasai

Kalaallit Nunaannut nioqqutissanik assartuussinerit pingaartumik umiarsuit, nunani allani aamma imaani ammaannartumi angalanerminni Ilanngussaq VI-mik malinnereersut atorlugit ingerlanneqartarmata, inuussutissarsiortunut aningaasartuutaanerusussanik, atuisunut tutsinneqartussanik nutaanik pisoqarnissaa naatsorsuutigineqanngilaq.

Tusarniaaneq

Siunnersuut 2020-mi 12. novembarimiit 22. decembarimut tamanut ammasumik tusarniaassutigineqarpoq. Tusarniaanermi akissuteqaatit attuumassuteqarneri malillugit ilanngunneqarput.

Ilanngussat

1. Allakkiaq – MARPOL Ilanngussaq VI